

Eklesiastés

E buki di Eklesiastés ta un buki ku hopi hende ta mal komprendé. Algun ta bisa ku Eklesiastés ta siña e doktrinanan falsu. Ta bèrdat ku esaki ta un di e bukinan favorito di sektanan i asta ateonan, manera Voltaire. Lesando e buki, bo por haña impreshon ku e outor su doktrina ta laga hopi di deseá...ku e no ta harmonisá ku otro tesktonan di Skritura.

Algun studiante di Beibel asta ta haña ku e buki no ta meresé di forma parti di Beibel mes. Pa nèt e motibu ei, Eklesiastés tabata un di e bukinan den Beibel ku hudiunan den e Konsilio na Jamnia tabatin debate si e ta pertenesé den e kanón bibliko na aña 90 A.D.

Ma en realidat, e problema no ta e buki. E problema ta e manera ku hende ta komprendé Beibel hopi biaha. Hopi hende ta lesa Beibel riba riba. No por hasi esei ku ningun buki di Beibel i sigur no ku Eklesiastés.

Si Dios ta Outor di Beibel (i E ta!), i nunca E ta kiboká òf saka mentira, anto ningun teksto den Beibel por kontradisí Su Palabra santu. E doktrina ei ta sumamente importante...un doktrina sinembargu ku tantu hende ta ignorá. Relashoná ku esei, tantu hende ta saka tekstonan for di nan konteksto. Nan ta lesa un versíkulo isolá for di e teksto rondó di e versíkulo òf ta ignorá por kompleto loke e restu di Beibel ta bisa. Esei ta un problema fatal...especialmente den e buki di Eklesiastés. Bo por yega na tur klase di kreensia i praktika malamente kiboká i falsu...ku ta kontradisí sobrá di Skritura.

Por ehèmpel, 8:15 ta bisa “No tin nada bon pa hende bou di solo ku solamente kome, bebe i ta alegre” (mira tambe 2:24). E filosofia ei sigur no ta kuadra ku otro tekstonan di Skritura. Ma tin hende ku ta tuma e teksto ei (òf otro teksto ku ta kumibiní nan filosofia òf kreensia) i ta para riba ku Beibel ta aprobá di nan sistema di biba i kreensia.

Komprendé bon, si ta parse ku Eklesiastés su siñansa no ta harmonisá ku Beibel, anto mester buska pa sa mas mihó kiko e buki ta siña.

Un otro motibu ku hende tin pregunta tokante Eklesiastés ta pasobra nan no ta komprendé e propositonan i perspektivanan di e buki. Ta importante pa komprendé ku e buki di Eklesiastés ta un búskeda pa e filosofia korekto di bida. Si bo no ta kòrda esaki, bo por interpretá e tekstonan inkorekto.

Eklesiastés ta un buki ku ta analisá diferente filosofia di bida pa determiná ki sorto di bida ta bal e la pena pa biba. E ta un búskeda di un persona ku ta mira banidat so tur rònt di dje te ora su bista ta habri pa e speransa ku Dios ta ofresé. Den e buki, e outor humano ta pasa dor di e proseso di rasonamentu di hende “bou di solo” te yega na su konklushon final. Esaki ta guia na un konfeshon di pesimismo i frakaso *ora Dios ta ekskluí for di bida*. Eklesiastés ta mustra lo mihó ku hende por hasi separá di Dios!

Básikamente filosofia ta hende su búskeda pa bèrdat. En general por bisa ku filosofia tin dos perspektiva. (1) E úniko fuente di konosementu ta *eksperensia humano*. Pues, hende por sa solamente loke e ta eksperensia. (2) E fuente prinsipal di konosementu ta *rasonamentu humano*. Esta, hende por sa solamente loke e por komprendé ku su mente.

E outor di Eklesiastés a buska e filosofia korekto di bida. Por nota ku el a buska den tur dos direkshon: eksperensia humano (2:4-10) i rasonamentu humano (1:17). Konklushon di e outor su búskeda rípidamente den tur dos direkshon tabata “tur ta banidat”.

E outor—dor di su estudio—a yega na konklushon ku bèrdat ta bin for di un revelashon di Dios. No ta nesario pa bai pafó di Beibel pa bin haña sa di filosofianan humano di bida.

Ta importante pa kompéndé ku e argumentonan den e buki, no ta Dios Su argumentonan. E buki ta Dios Su relato di *hende* su argumentonan. Pues, Dios a inkluí den e buki un relato bèrdat di rasonamentu humano pa yega na nifikashon di bida. Ma kompéndé bon ku no tur e argumentonan ta bèrdat.

Beibel ta kontené diferente mentira: Jakòb a gaña Isaak, Gehazi a gaña Eliseo, Satanas a gaña Efa. E tekstonan aki ta Dios Su relato bèrdat di e mentira...ma Dios no ta gaña. Pues esei ta splika dikun diferente teksto ta kontradisí otro teksto den Beibel (2:24; 3:19-20; 8:15). “No tin nada mihó pa un hende ku kome i bebe i bisa su mes ku su trabou ta bon” (2:24). “Destino di yu di hende i destino di bestia ta meskos. Manera esun ta muri, e otro tambe ta muri; ...no tin bentaha pa hende riba bestia, pasobra tur ta banidat. Tur ta bai na e mesun lugá. Tur a bin di stòf i tur ta bolbe na stòf.” (3:19-20). “...mi a rekomendá plaser, pasobra no tin nada bon pa hende bou di solo ku solamente kome, bebe, i ta alegre...” (8:15). E rasonamentu ei klaramente no ta bèrdat, ma e ta un relato bèrdat di e rasonamentu eronio!

Den e buki di Eklesiastés, e outor (ku ta yama su mes “Predikadó”) ta argumentá i rasoná dor di su dudanan i ta yega na un konfiansa firme den e hustisia, sabiduria i bondat di Dios. E ta mira ku bida ta yen di “banidatnan” ku ta laga kara di hende na bèrguensa. E Predikadó ta realisá ku Dios Su proposito ta ku “banidatnan” lo desapuntá hende. Ma e ta kompéndé ku no ta intenshon di “banidatnan” solamente pa kruelmente desepshoná hende, ma pa mostra hende ku nan por haña alegria bèrdadero solamente den Dios mes!

Manera G. Campbell Morgan a bisa, “Eklesiastés ta un konfeshon inspirá di frakaso i pesimismo, ora Dios ta ekskluí, ora hende ta biba bou di solo, i ta lubidá e parti mas importante, ku semper ta riba solo, e kosnan etèrno i duradero. Si bo ke sa kiko ta sosodé ku un hòmbler di gran privilegio, i gran edukashon i gran sabiduria, lesa e relato aki di un hòmbler ku a pone Dios un banda den su bida aktual.”

Ta parse ku e Predikadó tin un perspektiva pesimista pa tres motibu. (1) El a mira bida for di punto di bista di su propio interes na lugá di interes pa otronan. El a biba pa haña, na lugá di duna. (2) E Predikadó a mira bida isolá for di Dios, na lugá di bida kontrolá pa medio di Dios. Masha poko Dios ta mensioná mes den e buki. Henter su perspektiva ta riba hende (4:1-3). (3) E Predikadó a mira bida humano ku lasonan estrecho pa ku graf na lugá di mira hende su destino despues di graf. E outor tabata hopi preokupá ku morto (2:12-16; 3:18-22; 12:1-7).

E buki ta zona masha moderno ku tur su rasonamentu i preguntanan. Un diferencia sinembargu ta ku hopi hende den nos mundu moderno no ta kere ku Dios ta eksistí. Si Dios no ta eksistí, anto ta bèrdat ku morto ta final di tur kos. Ma en kontraste di hende moderno, e eskritor di Eklesiastés si a kere ku Dios t’ei (5:1-7) i el a yega na e konklushon korekto ku e tin ku duna kuenta na Dios finalmente.

I. NÒMBER DI E BUKI

Nos ta haña nòmber di e buki, Eklesiastés, for di 1:1, “E palabranan di e Predikadó”. E nòmber ta bin via latin for di e tradukshon griegu di Tèstament Bieu (yamá Septuigenta òf LXX), EKKLESIASTES. Eklesiastés ta nifiká “un ku ta papia ku un grupo di hende ku a reuní; pues, un Predikadó”. Pues, Eklesiastés ta nifiká “Predikadó”.

“Eklesiastés” ta un bon tradukshon di e nòmber hebreo, QOHELET. E palabra ei ta bin di e palabra QAHAL nifikando “pa reuní, pa yama un reunion”...i pues pa papia ku un grupo di hende ku a reuní. Den tempu di Tèstament Bieu, QOHELET a referí na puesto di un siñadó òf

oradó ofisial pa ku un grupo di hende ku a reuní, anto despues el a referí na e oradó mes...òf Predikadó.

E palabra “Predikadó” (QOHELET) ta aparesé 7X den e buki (1:1,2,12; 7:27; 12:8,9,10). E palabra no ta aparesé mas biaha den Tèstament Bieu! Outor di e buki ta yama su mes QOHELET (Predikadó) vários bes, i pues, e ta un título apropiá pa e buki.

II. OUTOR DI E BUKI

Nòmber di e outor no ta aparesé den e teksto di Eklesiastés. Komo resultado tin bastante pregunta ken e outor tabata. Básikamente tin dos punto di bista entre evangélikonan awendia.

A. SALOMON

Tradishonalmente studiantenan di Beibel a haña ku Salomon a yama su mes QOHELET (Predikadó) i ku e ta outor di e buki. Nan a haña ku e lo a skirbi e buki den su biehes, despues ku el a repentí di su pikánan menshoná den 1 Reinan 11:1-13. (Algun tin e pensamentu ku Salomon a skirbi Kantika di Salomon tempu e tabata hóben i enamorá, Proverbionan na edat mediano ora e tabatin su mihó abilidadat mental, i Eklesiastés durante su biehes, siendo desapuntá i desgustá ku e karnalidad di un gran parti di su bida.) Nos sa ku Salomon tabata sabí, ma ku e no a sigui su mes sabiduria. Kisas e buki ta un outo-biografia di Salomon su eksperensianan i pensamentunan tempu ku el a bandoná Señor i ku e buki ta evidencia ku Salomon a repentí i regresá bèk na Señor. Pusíbelmente esei tabata e kaso.

E siguiente tekstonan den Eklesiastés ta harmonisá ku e pusibilidad ku Salomon por tabata outor:

- 1:1 - e outor a identifiká su mes komo “yu hòmber di David”
- 1:1,12,16 - e outor tabata “rei di Israel na Herusalèm”
- 1:16 i 12:9 - e outor tabatin mas sabiduria ku tur otro mandatario na Yerusalèm
- 2:3 - e outor tabatin oportunitat pa purba plaser di tur forma
- 2:4-6 - e outor a hasi diferente proyekto di konstrukshon grandi
- 2:7 - e outor tabatin tantísimo sirbidó
- 2:8 - e outor tabatin rikesa imenso
- 2:9 - e outor “a bira mas grandi i a surpasá tur esnan ku tabata na Herusalèm promé” kun’è.
- 12:9 – e outor “a komponé hopi proverbio”

Ekspertonan di idioma hebreo tambe ta haña ku e outor a inkorporá diferente palabra den e teksto fuera di hebreo. Tin palabra di vários pais...asta algun palabra na un idioma di India. Esaki tambe por harmonisá ku e kreensia ku Salomon ta e outor debí ku Salomon tabata barku ku a bai India.

Ma tin un otro perspektiva. Kisas Salomon a skirbi e buki promé ku el a desviá for di Dios—ora e tabata konfia Señor. Si esei ta e kaso, el a skirbi e buki pa laga su lektornan sa ku nan no por haña felisidat ningun otro kaminda sino ta den Señor!

Ningun otro desendiente di David ta harmonisá mihó ku e spesifikashonnan aki ku Salomon. En general, studiantenan di Beibel, tantu kristian komo hudiu, ta aseptá ku Salomon a skirbi henter e buki.

B. UN SABIO FUERA DI SALOMON

Ma di otro banda, bastante evangéliko, luchando ku e echu ku Salomon a bandoná Dios i segun nos sa nunca a repentí, ta haña ku tin argumentonan ku ta indiká ku Salomon no tabata e eskritor. Talbes un sabio ku tabata buska e nifikashon di bida “bou di solo” basando su estudio riba loke Salomon a eksperensia a skirbi komo sifuera e ta Salomon. Talbes e outor ta pretendé ku e ta Salomon pa argumentá si Salomon no por a haña satisfakshon i proposito den bida dor di

gosa tur loke mundu ta ofresé “bou di solo”, anto ta sigur ningun hende mas por haña satisfakshon i proposito tampoko!

Argumentonan pa e punto di bista aki tambe ta konvensiente. (1) “yu hòMBER di David” por referí na kualke desendiente di David. (2) Tambe e outor ta bisa ku e “tabata rei di Israel” (1:12). E implikashon ta ku e no tabata rei mas. Por splika esei fásilmente. E outor a bisa ku tempu ku el a hasi e estudio aki, e tabata rei. No tin otro manera pa bisa esei. (3) E outor a bisa ku el a “surpasá tur esnan (reinan) ku tabata na Herusalèm promé ku mi” (1:16; 2:9). Si Salomon ta e outor, David lo tabata e úniko rei di Israel ku a reina na Yerusalèm promé ku Salomon. Sigur e no tabata referí na e reinan pagano jebusita ku a reina promé ku David. (4) Salomon a identifiká su mes komo outor di Proverbionan i Kantikanan di Salomon. Pakiko e no sigui e kustumber ei i identifiká su mes komo outor di Eklesiastés? Talbes ta pasobra e no tabata e outor.

(5) Outor di Eklesiastés tambe a papia di kos ku el a sufri: tristesa pa motibu di opreshon di hende (4:1), korupshon den gobièrno (5:8-9), aktitut apropiá pa ku rei for di punto di bista di e suidadero (4:13; 8:2-5; 10:17,20), mandatarionan indigno ku no ta hasi distinkshon entre suidaderonan bon i malu. Esakinan ta kos ku un hende manera Salomon nunca lo a pasa aden. I siendo rei, si Salomon tabata sa di e kosnan aki, e por a korigí nan. No ta lògiko ku rei Salomon lo protestá loke rei—e mes—a hasi!

(6) Den prólogo di e buki (1:1-11) i epílogo (12:8-14), e outor ta referí na e Predikadó (QOHELET) ku e pronòmber “e” (“derde persoon enkelvoud”). Den e parti meimei (1:12 – 12:7) e pronòmber ta bira “mi” (“eerste persoon enkelvoud”). Pusíbelmente esaki ta indiká ku un otro eskritor a skirbi e introdukshon i konklushon di e buki. E ta evaluá e palabranan di e Predikadó ku a basa su estudio riba loke Salomon a eksperensia durante su bida.

No ta pusíbel pa nos yega na un òf otro desishon konklusivo ken e outor tabata. Salomon ta keda nos eskoho prinsipal. Nos no ta konvensé ku ningun teksto den e buki ta eliminá e posibilidat ku Salomon por tabata e outor.

Den nos estudio, nos lo sali for di punto di bista ku e probabel eskritor tabata Salomon, maske nos no ta konvensé ku esei tabata e kaso.

III. LEKTORNAN DI E BUKI

E buki di Eklesiastés no ta mensioná pa ken e outor a skirbi. Tin diferente pensamentu pa ku esaki.

Pusíbelmente e buki a originá ku ún òf mas charla ku Salomon a duna na e hendenan di su gobièrno. Eskribanan a skirbi esaki palabra pa palabra, i despues a manda kopianan di e diskurso pa otronan lesa. E echu ku e buki ku frekuensia ta referí na gobièrno korupto talbes ta sostené e pensamentu ku e buki a wòrdu skirbí pa hudiunan i tambe hende di otro pais. Salomon sigur lo no a skirbi esei tokante su mes gobièrno.

Otronan, notando e echu ku 11:9 i 12:1 ta mensioná hubentut i ku 12:12 ta referí na “mi yu”, ta pensa ku e outor a skirbi pa hòbennan hudiu pa nan por siña for di su eksperensianan.

Sin duda e buki a wòrdu skirbí pa pone hende pensa. Su kontenido ta afektá e lektor su perspektiva pa ku bida en bista di e echu ku Dios ta kumpli ku Su obra soberano mediante historia!

IV. FECHA DI E BUKI

Si Salomon (kende a reina di 970-931 B.C.) a skirbi e buki aki ora el a bira grandi—kisas el a skirbié entre aña 940 i 935 B.C. Den 2:1-11, e outor ta deskribí henter un bida di akumulashon di kosnan material. Kapítulonan 11 i 12 ta duna impreshon ku e outor ya kaba ta eksperensia biehes.

Di otro banda, si el a skirbi e buki promé ku el a desvia di Señor, e por a skirbié na aña 960-950 B.C.

Evangélikonan ku ta kere ku e buki a wòrdu skirbí despues di Salomon ta pensa ku el a wòrdu skirbi kisas 200 aña despues di Salomon, esta den siglo 8.

V. PROPOSITO DI E BUKI

Masha poko hende tin e lúho, tempu, i abilidad pa eksperensia, investigá, i evaluá hopi diferente filosofia di bida. E outor (nos lo asumí ku tabata Salomon) tabatin e oportunidat i a hasié. Pues, e buki ta estudio di un persona ku a purba tur kos pa yega na un filosofia di bida sano. Despues di su estudio, el a duna un charla tokante su deskubrimentu. Su teksto tabata, “Banidat di banidatnan! Tur ta banidat.” (1:2). Esaki ta ripití na konklushon di e buki (12:8). Huntu ku esaki ta e pregunta, “Ki probecho hende tin di tur su trabou ku e ta hasi bou di solo?” (1:3). E pregunta aki na komienso di e sermon ta duna impreshon ku e Predikadó ta bai buska e kontesta den su sermon. I lesando dor di e buki, bo por ripará ku esei ta presis loke el a hasi. Eklesiastés ta trata ku e búskeda di hende pa haña e meta prinsipal di bida.

Por haña su konklushon na final di e buki: teme Dios i warda Su mandamentunan pasobra un dia kada persona tin ku duna kuenta na Dios (12:13-14). Pues nos por bisa ku lema di e buki ta e pregunta kon bo por hiba un bida ku ta surpasá e banidat di mundu? Of talbes nos por ekspresá esaki ku un otro pregunta: Bida sin Dios ta bal e la pena?

Pa kontesta, e outor tin (1) un meta negativo i (2) un meta positivo. Laga nos pensa promé tokante e meta negativo.

(1) Hende ta buska satisfakshon i proposito den bida tur kaminda. E Predikadó a hasi meskos. El a buska satesfakshon den siensia (1:4-11), filosofia (1:12-18), bebida (2:3), konstrukshon i agrikultura (2:4-6), rikesa (2:7-8a), músika i seksualidat (2:8b), puesto (2:9), hedonismo (2:10), materialismo (2:17-26), fatalismo (3:1-15), deísmo (3:1-4:16), kumpli ku eksigensianan religioso (5:1-18), rikesa (5:19-6:12), sabiduria i moralidat (7:1-12:12). Ma el a deskubrí ku ningun di nan por satesfasé! Di bèrdad, nada den mundu ta duna satesfakshon real den bida. E meta negativo di e outor tabata pa muestra ku ningun filosofia di bida i ningun kos den mundu por satesfasé hende den e profundidat di su ser. Tur kos di e bida “bou di solo” ta “banidat” (“bashíheit”) i “korementu tras di biento”! Bida ta yen di desapunto i kansansio!

(2) En kontraste, e Predikadó su meta positivo tabata pa muestra ku tin nifikashon i satesfakshon den bida...ma *no* separá for di Dios! Dios *so* por duna satisfakshon!

Esei ta sali na kla mas den final di e buki. Promé ku kapítulo ocho, e outor a wak rònt. Despues el a kuminsá wak ariba. Despues di mira ku metanan mundano ta banidat, e outor ta konkluí ku Dios ta e meta prinsipal den bida. E outor ta laga sa ku bida tin proposito solamente ora bo ta “kòrda tambe riba bo Kreador” (12:1) i ora bo ta bib’é conforme ku Dios Su mandamentunan kòrdando ku bo tin ku duna kuenta na n’E (12:13-14). E ta muestra ku un bida di balor ta un bida bibá pa sirbi Dios! Ta Dios Su obra so ku ta permanesé, i E so por duna balor duradero den bida. Bibando pa Dios—na lugá di bo mes—ta un bida ku lo no resultá di ta “banidat”! Pues, e buki ta yuda e lesadó komprendé ku e tin ku desaroyá e perspektiva ku Dios mester ta sentral den su bida.

Nos por resumí diferente proposito di Eklesiastés. (1) Pa muestra e banidat di kore tras di metanan materialista i terenal komo un fin riba nan mes. (2) Pa demosntrá ku kada esfuerso di hende ta en bano si ta ekskluí Dios. (3) Pa dirigí hende na Dios komo e fuente di tur loke ta bèrdaderamente bon. (4) Pa laga sa ku solamente e obra di Dios ta permanesé. E so por duna balor bèrdadero na hende su bida i servisio.

E eskritor ta urgi su lektornan pa no pone nan fe i speransa den loke e mundu bou di Dios su maldishon por dun’é, ma na lugá di esei depositá su konfiansa den e Kreador mes. En korto, e ke konvensé hende ku kualke filosofia ku ta ignorá Dios ta banidat!

Nos por bisa ku un di e propositonan di e buki aki ta pa alehá nos for di nos amor pa mundu. Eklesiastés ripitidamente ta papia tokante e “banidat” di tur loke tin den mundu. E mensahe di e buki aki ta “No stima mundu, ni e kosnan ku tin den mundu. Si un hende ta stima

mundu, e amor di e Tata no ta den dje. Pasobra tur loke ku tin den mundu, e deseo di karni i e deseo di wowo i e orguyo di bida, no ta bin di e Tata sino di e mundu. I e mundu ta pasa bai i su deseonan tambe, ma esun ku hasi e boluntad di Dios ta permanesé pa semper” (1 Juan 2:15-17). Colosensenan 3:2 ta bis’é di un otro forma: “Pone boso mente riba e kosnan djariba, no riba e kosnan ku ta riba tera”.

Maske e buki di Eklesiastés a wòrdu skirbí miles di aña pasá, su mensahe ta relevante i sumamente importante pa nos mundu awendia. Ta esensial pa hende komprendé ku nunca nan por yega na alegria i satesfakshon bèrdadero den e mundu aki separá di Dios.

VI. STRUKTURA DI E BUKI

Esaki ta masha kompliká. Ta kasi mesun difísil ku traha un skema di e buki di Proverbionan. Nos lo duna vários ehèmpel.

- I. OPSERVASHON I KONFESHON – 1-7
- II. INSTRUKSHON I SPIÈRTAMENTU – 8-12

Algún ta haña ku Eklesiastés ta ún sermon. Na komienso e ta anunsiá e lema, tin un introdukshon kortiku, desaroyo di e lema, i aplikashon praktiko di e lema den e konklushon.

- I. PRÓLOGO – 1:1-11
- II. PARTI PRINSIPAL – 1:12 – 12:8
- III. EPÍLOGO – 12:9-14

Otronan ta di opinion ku tin vários sermon den e buki. Por ehèmpel, segun Irving Jensen, e parti prinsipal di e buki (1:12 – 12:7) ta konsistí di kwater sermon. Den kada sermon, e Predikadó ta trata ku dos tópiko: banidat i speransa. Den otro palabra, den kada sermon, e outor ta mustra promé kon inútil bida ta for di e perspektiva terenal (“bou di solo”); anto e ta mustra ku por haña speransa bèrdadero solamente den Dios.

- INTRODUKSHON – 1:1-11
 - Punto di Salida Deklará
- I. SERMON #1 – 1:12 – 3:15
 - A. Banidat – 1:12-2:23
 - B. Proposito ku Dios – 2:24 – 3:15
- II. SERMON #2 – 3:16 – 5:20
 - A. Banidat – 3:16 – 4:16
 - B. Proposito ku Dios – 5:1-7
 - C. Banidat – 5:8-17
 - D. Proposito ku Dios – 5:18-20
- III. SERMON #3 – 6:1 – 8:13
 - E. Banidat – 6:1-12
 - F. Proposito ku Dios – 7:1 – 8:13
- IV. SERMON #4 – 8:14 – 12:7
 - G. Banidat – 8:14 – 9:18
 - H. Proposito ku Dios – 10:1 – 12:7
- KONKLUSHON – 12:8-14
 - A. Punto di Salida Ripití – 12:8
 - B. Resumen di e Solushon – 12:9-14

Otronan ta fiha nan atenshon riba e tópikonan. Alban Douglas a presentá e siguiente pensamentu:

- I. NATURALESA I SABIDURIA NO POR SATESFASÉ – 1:1 – 2:26

- II. TEMPU I MUNDU NO POR SATESFASÉ – 3:1-22
- III. OPRESHON I DESIGUALDAT NO POR SATESFASÉ – 4:1-16
- IV. RELIGION I RIKIESA NO POR SATESFASÉ – 5:1-20
- V. ENTIERO I PIKÁ NO POR SATESFASÉ – 6:1 – 8:17
- VI. MORTO I LOKURA NO POR SATESFASÉ – 9:1 – 10:20
- VII. MISHON I SALBASHON POR SATESFASÉ – 11:1 – 12:14

VIII. OPSERVASHONNAN DI E BUKI

E buki di Eklesiastés nunka ta sitá den Tèstament Nobo. Talbes Romanonan 8:18-22 ta referí na e mensahe di Eklesiastés...ma nos ni ta sigur di esei.

Nos ke nota algun punto:

A. PALABRANAN KU TA DESTAKÁ DEN EKLESIASTÉS

Nos ke mira diferente palabra i ekspreshonnan ku ta úniko òf ta destaká den Eklesiastés. Meskos ku otro bukinan, un palabra ta destaká sigur, “banidat”, usá 36 biaha den e buki.

KOMPARANDO E BUKINAN POÉTIKO

BUKI	PALABRA KLAVE	TÓPIKO KLAVE
Jòb	Prueba	Den fòrnu di prueba
Salmonan	Alabansa	Meditashonnan i alabansa di e hòmber rekto
Proverbionan	Sabiduria	Deskripsjon i fruta di e hòmber rekto
Eklesiastés	Banidat	E kaminda pa Dios
Kantika di Salomon	Amor	E kaminda di Dios

E lema, usando e palabra aki, ta usá na komienso di e buki (1:2) i ta ripití na final (12:8): “Banidat di banidatnan”, e Predikadó ta bisa, ‘Banidat di banidatnan! Tur ta banidat.’ Meimei di e banidat na komienso i e banidat na final, tin hopi banidat den e buki. Ripará dies banidat den e buki:

- E banidat di sabiduria humano – 2:15-16
- E banidat di obra humano – 2:19-21
- E banidat di proposito humano – 2:26
- E banidat di rivalidat humano – 4:4
- E banidat di avarisia (golosidat) humano – 4:8
- E banidat di fama humano – 4:16
- E banidat di “insasiabilidad” humano – 5:10
- E banidat di kudishi humano – 6:9
- E banidat di lokura humano – 7:6
- E banidat di rekompensa humano – 8:10,14

“Bou di solo” (29X) ta referí na e mentalidat terenal i temporal di e hende natural. Eklesiastés ta mustra ku bida “bou di solo” ta “banidat”. Pa haña un perspektiva yen di speransa, mester wak den direkshon di Dios, kende ta riba solo.

“Korementu tras di bientu” (9X – 1:14,17; 2:11,17,26; 4:4,6,16; 6:9) ta un ekspreshon hañá den Eklesiastés so.

Tin algun otro palabra ku ta mas komún ma sinembargu ta destaká. “Trabou” ta mensioná 24 biaha i “sabiduria” 29 bes. Den Proverbionan, sabiduria ta referí na e sabiduria di Dios ariba solo. Den Eklesiastés, sabiduria ta nifiká e sabiduria bou di solo. Den kapitùlo ún, e Pedikadó a buska satesfakshon dor di sabiduria. Ma sabiduria bèrdadero semper ta kuminsá ku Dios...“temor di Señor ta komienso di sabiduria” (Salmo 111:10).

Tambe ta interesante ku maske “Dios” ta mensioná 41 biaha, e outor ta mir’E prinsipalmente komo e Dios-Kreador... konfirmá dor di e echu ku e ta usa hebreo ELOHIM. E nunka ta usa e nòmber JEHOVA den Eklesiastés, un nòmber mas intimo pa Dios, komo Redentor-Salvador.

B. HUBENTUT I BIEHES

Eklesiastés ta klousurá (12:1-6) ku konseho pa hóbennan. Pone un fundeshi sólido tempu bo ta hóben (12:1). Despues 12:2-5 ta deskribí hende di edat atvansá. No tur ora ta fásil pa komprendé nifikashon di e ekspreshon:

12:2 – “solo, lus, luna, strea” - ta referí na e inabilitat pa gosa mas

12:3 – “guardianan di e kas” – probabelmente brasanan

“hòmbernan fuerte” - pianan

“muladónan ta stòp di mula” – djente ta kai

“esnan ku ta wak dor di bentana” – wowo ta bira dòf

12:4 – “portanan di kaya ta wòrdu será” – ménos aksesu na mundu pafó di kas

“zonido di mulamentu ta baha” – zonido alegre di hende mas hóben for di kua

esnan grandi ta isolá

“hende ta lamta ora parha kuminsá kanta” – hende grandi ta spierta ora ta

madrugá

“yu muhénan di kantika ta kanta poko poko” – sea ta no por kanta òf gosa

kantamentu

12:5 – “hende tin miedu di lugá haltu” – miedu di haltura (“hoogtevrees”)

“terornan riba kaminda” – miedu di tráfiiko

“palu di amandel ta floria” – kabei blanku

“e tirakochi ta lastra pia” – un tiki peso ta bira un karga pisá

“e ta pèrdè apetit”

12:6 ta duna tres portrèt simbóliko pa morto: “kabuya di plata wòrdu kibrá i e kòmchi

di oro wòrdu plèchá”, “kanika banda di e fuente wòrdu kibrá na pida-pida”

“wil na pos wòrdu kibrá”

C. KONKLUSHON - 12:13-14

Un persona ku ta lesa e buki kompleto ku atenshon, ora e ta yega na e último mandamentu den e buki (“teme Dios i warda Su mandamentunan”), e por komprendé ku Kristo so por salb’é. Lei no por salba. E ta deseñá pa trese hende na Kristo. E buki aki ta deseñá pa trese hende bibando bou di solo na Kristo.

Si tin un buki den Tèstament Bieu ku ta bal e la pena pa hende sin Kristo lesa i komprendé, esei lo ta e buki di Eklesiastés. Ademas, esaki talbes ta un di e bukinan mas importante di Tèstament Bieu pa kreyentenan lesa, studia, i evaluá nan bida konforme loke nan ta deskubrí den e buki! Pasobra un bida bibá pa bo mes i pa mundu—sin Dios—ta “banidat” i nada “bou di solo” bèrdaderamente por satesfasé e kurason humano!

Literatura Konsultá

Adams, Jay. *Life Under the Son: Counsel from the Book of Ecclesiastes* (USA: Timeless Texts, 1999), p. iii-1.

Archer, Gleason L. Jr. *A Survey of the Old Testament Introduction* (Chicago: Moody Press, 1985), p. 483-496.

-----. Merrill C. Tenney, general editor, “Ecclesiastes”, *Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 2, p. 184-190.

Baxter, J. Sidlow. *Explore the Book* (Grand Rapids: Zondervan Publishing House, 1960), vol. 3, p. 142-168.

- Demaray, Donald E. *A Layman's Guide to Our Bible* (Los Angeles: Cowman Publishing Company, 1964), p. 97-98.
- Dillard, Raymond B. & Logman III, Tremper. *An Introduction to the Old Testament* (Grand Rapids: Zondervan Publishing House, 1994), p. 247-255.
- Douglas, Alban. *Old Testament Survey* notes Three Hills: P.B.I. 1983), p. 64-66.
- Jensen, Irving. *Jensen's Survey of The Old Testament* (Chicago: Moody Press, 1978), p. 295-304.
- Longman, Tremper III. "The Book of Ecclesiastes", *The New International Commentary on the Old Testament* (Grand Rapids: William B. Eerdmans Publishing Company, 1998), p. 1-40.
- Mears, Henrietta C. *What the Bible is All About* (Minneapolis: World Wide Publications, 1966), p. 199-203.
- Wright, J. Stafford. Frank E Gaebelein, general editor, "Ecclesiastes", *The Expositor's Bible Commentary Bible* (Grand Rapids: Zondervan Publishing House, 1991), vol. 5, p. 1135-1151.